

佛说八阳神咒经 1 卷

No. 428 [Nos. 427, 429-431]

佛说八阳神咒经

西晋月氏三藏竺法护译

闻如是：

一时，佛在王舍城灵鸟山中，时与大比丘众千二百五十人、菩萨千人俱，皆如弥勒菩萨等。

佛告舍利弗：「东方去是过一恒沙，有佛刹，佛号快乐如来。无所著。等正觉，今现在说法，国土名不可胜。

「舍利弗！东方去是过二恒沙有佛刹，佛号月英幢王如来。无所著。等正觉，今现在说法，国土名欢乐。

「舍利弗！东方去是过三恒沙有佛刹，佛号等遍明如来。无所著。等正觉，今现在说法，国土名喜爱。

「舍利弗！东方去是过四恒沙有佛刹，佛号分别过出清净如来。无所著。等正觉，今现在说法，国土名内唵。

「舍利弗！东方去是过五恒沙有佛刹，佛号等功德明首如来。无所著。等正觉，今现在说法，国土名无狐疑。

「舍利弗！东方去是过六恒沙有佛刹，佛号本草树首如来。无所著。等正觉，今现在说法，国土名无毒螫。

「舍利弗！东方去是过七恒沙有佛刹，佛号过宝莲华如来。无所著。等正觉，今现在说法，国土名莲华香。

「舍利弗！东方去是过八恒沙有佛刹，佛号宝乐莲华快住树王如来。无所著。等正觉，今现在说法，国土名甘音声称说。

「复次，舍利弗！诸佛如来清净国土，彼方无五浊、无爱欲、无女人、无意垢、无呪诅、无相择。

「复次，舍利弗！诸佛如来，若有善男子、善女人，闻是八佛名者，受持讽诵读奉行者，终不堕三恶道，除五不中止罪。

「复次，舍利弗！是善男子、善女人，若有持是八佛名及国土名者，受持讽诵读奉行之者，以是功德，若发菩萨心，所生处常遇陀邻尼、常遇相好、常遇相音、常遇右转福。是善男子、善女人，奉行是八佛教令，如其正行者，女人所生处转为男子。

「复次，舍利弗！诸佛如来，是善男子、善女人，以平坦净澡漱、正衣服，昼夜各三时奉读是经，得功德无量，第一四天王常拥护。是善男子、善女人，若在县官中当读是经、若在怨家中当读是经、若在盗贼中当读是经、若在水火中当读是经、若在海水中逢风浪恐怖当读是经、若在军兵对鬪中当读是经、若为蛊毒所中当读是经、若闻恶鸟鸣若恶梦当读是经、若为龙神所中当读是经、若为诸魔所中恐怖毛起者当读是经、若有急恐病疫疾痛者，持是八阳呪经呪之，立得除愈。」

是时，佛说要偈：

「是土无如来，	持是国土名，
一切众恶除，	疾得登正道。
所生常遇佛，	见觉大欢喜，
照是世上尊，	等心供事之。
百劫以无数，	着常当离之，
疾逮泥洹道，	奉是诸佛名，
今现诸如来，	奉行明教名。
为人朴直软，	在在见所生，
端正相好具，	巨亿万家生。
勇猛好布施，	为人不悭贪，
女人闻是要，	踊跃大欢喜，
去离女人身，	所生为男子。

诸兵不敢害，    盍道亦不幸，  
县官及盗贼，    终不害是人。  
五魔不能烧，    将帅及官属，  
奉行是经者，    不能中得便。」

尔时，第一四天王、弥勒菩萨等，白佛言：「我曹当共拥护持是八阳呪经一切学者，我曹当并力拥护，病者令愈。」

佛说：「如是。」

第一四天王、弥勒菩萨等比丘众，及诸天龙、鬼神、人民、阿须伦，闻经欢喜，为佛作礼而去。

八菩萨名：

第一名颯陀和菩萨、第二名罗那邻竭菩萨、第三名憍日兜菩萨、第四名那罗达菩萨、第五名须深菩萨、第六名因抵达菩萨、第七名摩诃须和萨和菩萨、第八名和轮调菩萨，是八人求道以来其劫无数，今未取佛。

是八人本俱学道时，俱愿八方、上下人民皆共使得佛。若有急者，当使呼我八人名字，即自得解除。若寿欲尽时，我八人便当飞行往迎之。愿持此一字之功德，愿一切人皆如八菩萨快也。

## 佛说八阳神呪经

---

【经文信息】大正藏第 14 册 No. 0428 佛说八阳神呪经

【版本记录】CBETA 电子佛典 Rev. 1.9 (Big5)，完成日期：2009/04/23

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供，维习安大德提供之高丽藏 CD 经文，阎学新大德输入 / Gamblers 大德校对，北美某大德提供，Jasmine 提供新式标点

【其他事项】本数据库可自由免费流通，详细内容请参阅【[中华电子佛典协会数据库版权宣告](#)】

---